


Zue soffoortiger Uusrais us dr Fasnachtszoone uffgrund vomene fasnachtsgrichtlige Entscheid wäge:

- | | |
|---|--|
| ☐ Missbryychliger Verwändig vo Faarb im Gsicht | ☐ E Myggeli zem Schmuuse dränge |
| ☐ Fäälender oder alter Blaggedde | ☐ De Gryte d Handdäsche filze |
| ☐ Schnitzelbangg singe ooni/ mit schlächter Pointe | ☐ Schlaagendi Argumänt yysetze |
| ☐ Röppli wäärfe ooni Goschdyym und Laarve | ☐ Fäälends Visum (Ziircher/ Schwoobe) |
| ☐ Röppli vom Boode ufflääse | ☐ Kiigeli im Muul haa |
| ☐ Lätz drummle | ☐ Nit uusässe |
| ☐ Pfyffe ooni Piccolo | ☐ Ain iiber e Duurscht gnoo haa |
| ☐ Nootekonformem Schränze | ☐ In d Gasse brunze |

Persoone, wo die Aawyysig nit bifolge, wäärde zer Vollstreggig vo dääre Zwangsmaassnaam in Uusschaffigshaft gnoo und vom Lällekeenig (Groossbasel) oder vom Wilde Maa (mindere Basel) uusgschafft!

Art. 1911 FGB



Uffenthaltsbewilligung

18. - 20. Hoornig 2013

**NOCH 3 DAG
Z-R-U-G-G!**

F



Als Asylant do hesch es schwäär
bruuni Hut, vo wyt kunnsch häär
e Loggekopf, e Tuurbaan drum
d Naase noone bitzli grumm.
E Sprooch wo kaine kaa verstoo
hesch no s lätze Baarfym gnoo
s duet jeeden uff dr ummehagge
dr Stämpel hesch grad uff dr Bagge.
Bisch Droogedyller, Mässerstächer
Fraueschänder, Schwäärverbrächer
Laadedieb und Autignagger
Kinderfrässer, Händabhagger
Bombeleeger, Terrorischt
Fluugispränger, Islamischt!

S kunnt jo dängg nit ungefäär
das Voorurdail vo naime häär.
Schwätzt dy ain vo däänen aa
frogsch dy waas dä gueti Maa
mit vollem Muul dir saage wott
oder eb er besser sott
die Kiigeli zeerscht aabeschlugge
oder denn in s Naasduech spugge.
Au d Maitli draue sich nimm uuse
soo ain wott doch zimpftig schmuuse
doch nämme s Gwiisi nit so gnau
s isch jo schliesslig nur e Frau
die pägget me dängg ooni z frooge
oder mischt in Cocktail Drooge!

Im Klyybegg unde meergsch uff s mool
s het soone Nätte fir dy Wool
frintlig und seer hilfsbirait
dy Batzeseggel ummedrait.
Laid er – s kaa basiere
vergässe dää denn z retourniere.
Dr Ander deert im lange Tschoope
schlycht uus dr Bangg und het sy Doope
verdächtig dief in Mantel druggt
was het dä Asylant do gmuggt?
Do schnätzlet s dää grad voornen aabe
e CD rollt in Stroossegraabe
do meergsch uff s mool, de bisch verkoo
daas isch jo dr Staibrügg doo!

Bi so vyyle Raibergschichte
kaan e Mängge guet verzichte
dass scho bald schreeg vis a vis
en Unterkumft fir die soll syy.
«Be eus im Aargau hend die Moore
gopferdelli nüüt verloore»
boldered s vo Bettwil oobe
«die werde ned zu eus abgschoobe».
Au im Tössdaal sait me nai
schigged die halt wiider hai!
Im Toggebuurg und z Walliselle
wänn sy kaini fremde Gselle
z Basel het me – wäär hätt s dänggt
die Schiffsydee am Änd versänggt.



Mer halte fescht an dääre Stell
nit jeeden isch e schlächte Gsell.
E Mänggen isch e guete Käärli
leert Dytsch – verzellt de Kinder Määrli
e guete Bappe – Ehemaa
het nie e beesi Absicht ghaa.
Doch laider isch das Bild verzeert
will me ständig numme gheert
wie bees die Fremden immer sinn
hänn Droogegäld im Zimmer dinn
Diebesguet bis unter s Dach
im Kaschte noone Schmuggelfach.

D Voorurdail dien dääglic stygge
d Eggstremischte langsam sygge
e Mängge dängg sich ganz im ghaime
schigge mer doch alli haime.
Die Radikaale riefte „Schluss!“
ab soffort leemer alli duss!
Doch stopp! An dääre Stell wird s gfeerlig
Eggstremischte – simmer eerlig
hetze nummen ooni z dängge
wänn so ganzi Masse längge.
Drum mues do jetz e Leesig stäche
zem die lätz Entwigglig z bräche!

Mer hänn is dänggt – so ganz mobyy!
biete d Joker hit Asyyl!
En Unterkumft zem Ummefaare
duet e mänggen Eerger spaare.
Egaal wohäär d au immer bisch
bi uns griegsch z Mampfen uff e Disch.
Doch die wo sich nit wänn binää
dääne diemer nyt me gää
mer wyyse sy, s liggt uff dr Hand
uusen us em Schwyzerland!
Wääre nämmlig numme noo
die wo sich binämme doo
gäbti s bald – mer wooge s z saage
nyt me iiber Fremdi z glaage.
S wuurti denne nootisnoo
de Voorurdail an Graage goo!

Doch ai Brobleem – mer gänn s jo zue
losst is immer no kai Rue!
Die renitänthe leen nit lugg
und sinn scho grad...

**NOCH 3 DAG
Z-R-U-G-G!**